

19-7

蜀中名勝記卷之十九

重慶府三


涪州

閩中曹學佺能始著

華陽國志巴子時雖都... 先王陵墓多在枳又云... 涪陵郡巴之南鄙從枳... 折丹涪水與楚商於地... 接司馬錯言取商於... 漢時恆有都尉守之... 蜀延縣中車騎都... 以... 治陽關于此... 又云江水至巴都... 涪水至枳縣西... 涪水至枳縣西... 涪水至枳縣西...

蜀中名勝記卷之十九
重慶府三
涪州
閩中曹學佺能始著

土坡文庫
文庫17
W216
7



文庫 17
W216
7



蜀中名勝記卷之十九

閩中曹學佺能始著

重慶府三

涪州

華陽國志巴子時雖都江州先王陵墓多在枳又云涪陵郡巴之南鄙從枳南入折丹涪水與楚商於地接司馬錯昔取商於繇此道也漢時恆有都尉守之蜀延熙中車騎鄧芝以江州都督治陽關于此陽關者巴子所置三關之一 水經江水東至枳縣西延江水從牂柯郡北流西屈注之又云江水至巴郡涪

蜀中名勝記

卷之十九

一

昭和六十年二月一日贈
去岐善唐氏寄

010185186127

陵縣注更始水酈註曰水東逕陽關巴子梁江之兩岸猶有梁處寰宇記云岑彭破公孫述將侯丹於黃石黃石者橫石灘也謂之石梁 水經註曰江水東至梨鄉歷雞鳴峽江之兩岸有枳縣治故華陽國志謂枳縣治涪陵水會庾仲雍謂有別江出武陵者也又曰更始水卽延江枝分之始也延水北入涪陵水王莽更名巴亭張堪爲縣會公孫述來擊于時同心義士選習水者筏渡堪於小別江卽此水也其水北至枳縣入江 方輿勝覽云涪江者自思州之上費溪發源經五十八節名灘方至黔州漑自黔州漑與

施州江會流九十里經彭水武隆二縣凡五百餘里與蜀江會于州之東以其出於黔州又呼黔江亦名內江其水淵澄清澈可鑿毛髮底見苔石魚鰕可數

張祐送李長史歸涪州詩涪江江上客歲晚卻還鄉暮過高唐雨秋經巫峽霜急灘船失次疊嶂樹無行好爲題新什知君思不常戴叔倫新至涪州先寄王員外使君縱詩文教通夷俗均輸問火田江分巴字水樹入夜郎煙毒瘴含秋氣陰崖蔽曙天路難空計日身老不由年將命甯知遠歸心詎可傳星郎復何意出守五溪邊陸游詩古壘西偏曉繫舟倚闌搔

首思悠悠欲營丹竈竟無地不見荔枝空遠遊官道
近江多亂石人家避水半危樓使君不用勤留客瘴
雨蠻煙我欲愁 方輿云黔江東岸有龜山州治其
上元和志舊州在岷江南今州在涪江西蜀漢涪陵
太守龐肱有惠政輿地碑目涪熙中左綿任子宜過
涪陵於民家見漢隸石闕上書漢涪陵太守龐肱闕
闕製如碑 東渡高峰之上與州治相對爲石甕磧
方輿勝覽云太守吳侯嘗遊石甕磧遇一女繖蓋步
磧上曰吾父居此瀕去解一玉環付廂吏爲我謝使
君異日當歷顯任子孫復守此州言訖不見按志吳

光輔爲涪守後三十年其孫仲復又守是邦今吳公
溪吳公山所爲得名也 舊經云吳君山一名鐵櫃
山橫互江北與涪陵縣相望雄壓眾山俯臨長江屹
立如櫃相傳武侯屯兵于此舊城猶存 勝覽云鐵
櫃之南爲北岩王真人修煉處也紹聖丁丑程伊川
謫涪郎普淨院闢堂傳易再閱歲爲元符庚辰乃徙
夷陵 碑目云涪陵江北普淨院記治平閒校書郎
傅耆撰北岩書院記嘉定丁丑簡池劉光祖撰普淨
院鉤深堂勝別駕黃庭堅書又有涪祐辛亥三月旣
望古口劉濟川三山林元成都杜庭燮三廬何清題

名又有汴陽吳克舒以紹興癸未書云日舉家來遊
阱掾侍行諸刻 輿地紀勝云開寶四年黔南上言
江心石魚見上有古記云廣德元年二月大江水退
石魚見部民相傳豐稔之兆按其處在近州鑑湖中
央石上刻雙魚一銜蓂草一銜蓮花各三十六鱗旁
有石秤石斗或十年或三五年一出唐大順元年鐫
詩甚多 方輿勝覽州西一里白鶴灘爾朱真人冲
舉之處志云爾朱旣浮江而下漁人有白石者舉網
得之擊磬方醒遂於涪西灘前修煉後乘白鶴仙去
因以名灘 又云爾朱先生種松山在州東二里種

時松影映石石皆有松紋至今呼松屏石採者禱於
先生乃得佳不煩人力自然成文 華陽國志延熙
二年馬忠定越嶲置赤甲軍常取涪陵之民蜀丞相
諸葛亮亦發勁卒三千人爲連弩士按志有赤甲戍
與黃草峽相近在李渡之上藺市之下杜甫詩云黃
草峽西船不歸赤甲山下行人稀卽此地也 碑目
云許雄山有古廣漢縣令神道碑俗呼爲誓虎碑碑
偶仆遂有虎入城縣官設祭復豎碑虎害乃止按山
在州西南七里山之東有馬援壩 志云馬援壩在
治南四里伏波祠在治東十里相傳將軍征武陵蠻

駐兵之處寰宇記涪陵江中有銅柱灘最峻急昔人
維舟于此見水底有銅柱云 灘之東爲錦繡洲九
域志云此洲人業織錦罽 宋翰詩錦繡洲猶在熊
羆夢已無文風齊兩蜀仙洞接三都白石從天設青
厓見地圖荔枝妃子國不復曩時輸 方輿勝覽云
城西十五里有妃子園其地多荔枝昔楊妃所嗜當
時以馬遞馳載七日七夜至京人馬多斃於路百姓
苦之故杜牧之過華清宮詩云長安迴望繡成堆山
頂千門次第開一騎紅塵妃子笑無人知道荔枝來
華陽國志涪陵郡有丹興縣以山出名丹也蜀時省

李特傳范長生一名延久又名九重涪陵丹興人按
史記巴寡婦清之先得丹穴而擅其利家富不貲清
能守其業用財自衛秦皇帝以爲貞婦而爲築女清
臺括地志云女清臺山在永安城東北七十里爲涪
陵南平二郡界

武隆縣

漢涪陵枳二縣地唐武德元年分涪陵縣立以邑界
武隆山爲名本志云枳縣故址在治東上流二十里
李膺益州記云內江水自萬甯西北二百八十里至
關頭灘灘長百步懸崖倒水舟楫莫通寰宇記云內

江一名涪陵江一名巴江在縣南屈曲北流又云蜀江門灘在縣前巴江水中 志云縣西一里古渡頭有斷石中白痕如劍光芒燭天名爲天劍又云南二十里有信水在峽口其泉如沸水與江等日有三潮每至則高丈餘又云龍寶潭在縣東北七十里古箐淒其人鳥兩絕杖簾而入幽徑可十里忽平沙廣野曲壑清泉別一世界 四夷考云武隆之地東隣黔楚西接牂柯北枕巴江南通貴筑又三面界土司爲酉陽之咽喉石砦之頂臂至若眞州則撲胸之患矣所謂難先全蜀險阨諸蠻者也

彭水縣

史記秦司馬錯取楚商於之地爲黔中郡卽此寰宇記云卽劉璋之漢葭縣 隋開皇十三年蠻帥內屬故於此地設彭水屬黔州亦州之所理也本志云舊理在壺頭山之麓今移於紹慶府基按宋史太平興國八年黔州摩圍山慶雲出通判黃仲震圖頌以獻中興小曆理宗始追封爲紹慶府焉 權載之黔州觀察使廳記云黔中爲楚西南徼道在漢爲武陵莊躋循江以略地唐蒙浮船以制越舊經地近荆楚候如巴蜀五溪襟束蠻蜚聚落陰雨多晦草木少凋寰

宇記云五溪謂酉辰巫武沅等五溪古老相傳楚子城巴巴子兄弟五人流入五溪各爲一溪之長一說五溪蠻皆盤瓠子孫自爲統長故有五溪之號古謂之蠻蠻聚落也三國志劉先主于五溪蠻之地置黔安郡卽此地樂史以爲郡後周設誤矣 劉長卿送任侍郎黔中充判官詩不識黔中路今看遣使臣猿隨萬里客鳥似五溪人地遠官無法山深俗易淳須令荒徼外亦解懼埋輪司空曙送龐判官赴黔中詩云天遠風雲異西南見一方亂山來蜀道諸水出辰陽堆案青油暮看碁畫角長論文誰可製記室有何

郎李嘉祐送上官侍御赴黔中詩莫向黔中路令人到欲迷水聲巫峽裏山色夜郎西樹隔朝雲合猿窺曉日啼南方饒翠羽知爾飲清溪許棠寄黔南李校書詩從戎巫峽外吟興更應多郡響蠻江漲山昏蜀雨過公筵饒越味俗土尙巴歌中夜懷吳夢知經灑瀕波顧非熊送皇甫司錄赴黔南幕詩黔南從事客祿利向來饒官受外臺屈家移一舸遙夜猿聲不斷寒木葉微凋別遠因多感新郎倍寂寥杜荀鶴送人尉黔中詩盤山行幾驛水路復通巴峽漲三川雪園開四季花公庭飛白鳥官俸請丹砂知尉黔中後高

吟采物華許琳黔中書事詩巴蜀水南偏山窮塞壘
寬歲時將近臘草樹未知寒獨狖啼朝雨羣牛向暮
灘更聞蠻俗近烽火不艱難竇羣黔中書懷詩萬事
非京國千山擁麗譙佩刀看日曬賜馬傍江調言語
多重譯壺觴每獨謠沿流如着翅不敢問歸橈李頰
黔中酬同院韋判官詩平生同所爲相遇偶然遲各
着青袍後無歸白社期江流來絕域府地管諸夷聖
代都無事從公且賦詩 碑目云漢故孝廉柳莊敏
碑在州廨內字迹銷譌唐黔南節度使趙國珍德政
碑上元二年立在州南隔江崔甯神道碑集古錄以

爲長慶二年立在州治山谷刀筆云宋左藏庫副使
東南第八將秦世章自長沙買石摹僧寶月古法帖
十卷載回黔安壁之紹聖院庭堅爲之跋按世章秦
子明涪州人也丹鉛錄謂寶月帖又在隋開皇帖南
唐昇元帖之前比之金薄匱紙銀錠櫃痕者優劣當
懸矣 紀勝云魯直謫居有涪翁晚策杖至此觀江
漲雨餘天欲涼十五字墨蹟在州之嘉禾堂又黔中
與人帖云庭堅頓首竊觀鎮靜足以安夷獠清節足
以服吏民郡閣宴閑時與僚佐歌舞以謝江山當亦
無不樂時別後未嘗不思英對也齋中小宴歌舞中

更得新進否此邦樂籍似皆勝渝瀘微有成都之風也 本志載宋冉木作黔州倅衙月山岩銘云黔號古郡地居極邊倅治倚山其山刺天有日月巖古老相傳視事累月徧求茫然偶濬溝渠巨石中填深掘視之厥狀嶮岏中竇一穴透明而圓皎如秋月翳絕雲煙旁輔三隙如星之聯技拭細觀古識存焉爰命僕夫挽置座前負以層石映以灣泉日對其側卷舒簡編凡物遭遇皆有因緣高岸深谷知幾變遷惟我月巖存千萬年又飛來峰銘云黔山角逐雲空相摩疊石其間如戟如戈否則踣伏橫立攢阿千狀萬怪

知名幾何惟飛來峰涪翁相遭有筆如椽三字袞袞一經品題聲價倍高譬如人乎何地無材不遇知音均混草萊有力吹噓清冥路開一飛冲天迥絕塵埃噫歟茲石千古皚皚四維整植如出剪裁日炙雨澆蒼然生苔不動惟汝何從飛來因涪翁重汝何能哉 志云綠陰軒在治南一里石軒下平曠可容十數人黃魯直過此手書綠陰軒三字鐫于石壁至元年紹慶總管向午鳳重修有卧佛巖與綠陰軒相近巖石欹懸生一竅甚圓仰窺之又生一竅其中虛明有橫石一塊眉目宛然如來佛曲肱枕卧時也 紀勝

云西南過江五里有摩圍山夷獠呼天爲圍以其高
摩於天也道家謂之洞天福地昔有樵者攀緣入洞
見二老圍碁其中回復尋之了不可得魯直安置黔
中寓開元寺號摩圍老人有石泉在山頂山勢壁立
泉從石竇中流出寺僧以甕接之爲朝夕清供碑目
載摩圍山唐人石刻云巴黔路途闊遠亦無館舍凡
至宿泊多倚溪巖就水造倉鑽木出火山谷集云丙
子仲秋黔守席上客有舉杜少陵中秋詩曰今夜鄜
州月閨中只獨看遙憐小兒女未解憶長安因戲作
詞云舉頭無語家在月明生處住擬上摩圍最上峰

頭試望之偏憐鐘秀苦淡同甘誰更有想見牽衣月
到愁邊總未知又丙子仲秋奉陪黔陽曹使君伯達
翫月作減字木蘭花兼簡施州張使君仲謀云中秋
多雨常是罽罍狼籍去今夜雲開須道姮娥得得來
不知雲外還有清光同此會笛在層樓聲徹摩圍頂
上頭九州要記云黔州有彭水在信甯縣卽古之
黔中地志云唐長孫無忌墓在信甯西岸岐山之麓
按史無忌洛陽人累官太子少傅同中書門下三品
高宗時諫立武后許敬宗誣奏無忌反削其官爵謫
黔州安置沒葬是鄉居人歲以三月三日致祭云

黔江縣

隋之石城縣也志云城東二十五里爲舊縣 又云歌羅驛在治東百九十里黃魯直竹枝歌七首題于驛壁其一云浮雲一百八盤縈落日四十九渡明鬼門關外莫言遠四海一家皆弟兄志云四十八渡水在治西二十里發源柵山溪水折流四十八灣夾于兩岸之間春月百花飄落隨水可愛又云治西五十里峭壁中有木櫃人迹不到 櫃子崖在四十八渡之中李頻泛黔江詩野梅將雪競江月與沙寒卽此水也

忠州

譙周三巴記曰臨江縣後漢初平六年立在永甯郡東四百里臨江南古城 水經曰江水又東逕臨江縣南註謂王莽之鹽江縣也郡國志云梁于此立臨江郡隋置臨州貞觀始改爲忠州忠之名以巴蔓子或云嚴顏按華陽國志周之季世巴國有亂將軍蔓子請師於楚許以三城楚王救巴巴國旣甯楚使請城蔓子曰藉楚之靈克弭禍難誠許楚王城將吾頭往謝之城不可得也乃自刎以頭授楚使楚王歎曰使吾得臣若巴蔓子用城何爲乃以上卿禮葬其頭

巴國葬其身亦以上卿禮今治西北一里有蔓子冢
三國志劉璋使嚴顏守巴郡爲張飛所擒欲降之
顏曰有斬頭將軍無降將軍飛怒命斬之顏從容曰
斫頭便斫頭何必怒也今臨江縣西南二十里有嚴
太守碑及祠蘇軾詩云先主反劉璋兵意頗不義孔
明古豪傑何以爲此事劉璋固庸主誰爲死不二嚴
子獨何賢談笑傲礎几國亡君已執嗟子死誰爲何
人刻山石使我空涕淚蘇轍詩云古碑殘缺不可讀
遠人愛惜未思磨相傳昔者嚴太守刻石千歲字已
譌嚴顏平生吾不記獨憶城破節最高被擒不辱古

亦有吾愛善折張飛豪軍中生死何足怪乘勝使氣
可若何斫頭徐死子無怒我豈畏死如兒曹匹夫受
戮或不避所重壯氣吞黃河臨危閒暇有如此覽碑
慷慨思橫戈自註云碑在忠州本志州西五十里江
中高阜名塘土洲有嚴顏墓碑及祠 九域志云臨
江郡有古屈原碑王象之碑目亦引之東坡謂屈原
古塔在忠忠不當有此意者後人追思爲之其詩曰
楚人悲屈原千歲意未歇精魂飄何處父老空哽咽
至今滄江上投飯救饑渴遺風成競渡猿叫楚山裂
屈原古壯士就死意甚烈世俗安得知眷眷不忍決

南賓舊屬楚山上有遺塔陸游詩云我遊南賓春暮時蜀船曾繫掛猿枝雲迷江岸屈原塔花落空山夏禹祠塔在江之南岸 紹聖四年王闢之知忠州建四賢閣於治後四賢者故相司徒鄭州刺史南華劉晏士安故相贈兵部尚書嘉興陸贄敬輿中書侍郎平章事贈司徒安邑李吉甫宏憲刑部尚書致仕贈右僕射下邳白居易樂天皆有像設今移在學宮輿地碑目云忠州學宮有漢江原君石闕闕上延熹等二十七字可捐自州西十五里移來者又有晉王右軍半月橋帖經涪翁題跋 又云州治有漢建初

中修道碑字已漫滅餘建初等十二字可辨治內議道堂有唐率更柘漿帖碑太守王聖涂購自臨江農民瞿氏命男宗摹刻紹聖四年七月二十四日後有山谷題跋 又云州儀門下有漢延熹嚴孝子碑按華陽國志元初中貢孝子嚴永卽此碑矣字已漫蝕餘延熹二年等八十餘字自城西二十里移來者文苑英華唐蘇頲有授忠州刺史上騎都尉王守廉制陳子昂有忠州江亭喜遇吳參軍見牛司倉序略云江亭迴瞰羅雜樹于階基山榭遙臨列羣峰于戶牖丹藤綠篠俯映長筵翠渚洪瀾交流合坐 杜

甫宴忠州使君姪宅詩出守吾家姪殊方此日歡自
須遊阮舍不是怕胡灘樂取長歌送杯饒旅思寬昔
曾如意舞牽牽強爲看李端送濮陽錄事赴忠州詩
成名不逐雙旌遠空印還爲一郡雄赤葉黃花隨野
岸青山白水映江楓巴人夜語孤舟裏越鳥春啼萬
壑中間說古書多未校肯令才子久西東白居易郡
中春燕因贈諸客詩僕本儒家子待詔金馬門塵泰
親近地孤負聖明恩一旦奉優詔萬里收遠人可憐
島夷帥自稱爲使君身騎牂柯馬口食巴江鱗暗淡
緋衫故爛斑白髮新是時歲一月玉曆布春分頒條

足皇澤命宴及良辰冉冉趨府吏蚩蚩聚州民有如
蟄蟲鳥亦應天地春薰草席鋪座藤枝酒注樽中庭
無平地高下隨所陳蠻鼓聲坎坎巴女舞蹲蹲使君
居上頭掩口語眾賓勿笑風俗陋勿欺官府貧蜂巢
與蟻穴隨分有君臣 樂天刺史茲邦風流暇豫日
事遊賞其踪跡最著者有東樓荔枝樓鳴玉溪龍昌
寺巴子臺東坡東澗諸勝黃魯直爲王聖涂作記云
樂天東樓以燕賓佐西樓以瞰鳴玉溪登龍昌上寺
以望江南諸山張樂巴子臺以會竹枝歌女東坡種
花東澗種柳皆相傳識其舊處焉 東樓卽城東樓

也白公東樓詩云山東邑居窄峽牽氣候偏林巒少
平地霧雨多陰天隱隱煮鹽火漠漠燒畚煙賴此東
樓夕風月時脩然憑軒望所思目斷心悵悵又東樓
竹詩云瀟灑城東樓遶樓多修竹森然一萬竿白粉
封青玉捲簾睡初覺欹枕看未足影轉色入樓牀席
生浮綠空城絕賓客向夕彌幽獨樓上夜不歸此君
留我宿 荔枝樓在治西南隅卽西樓也公旣作荔
枝圖以寄親友又建樓以賞之其詩曰鄉路音信斷
山城日月遲欲知州遠近階前摘荔枝又西樓詩云
悄悄復悄悄城隅隱林梢山郭燈火稀峽天星漢渺

年光東流水生計南枝鳥月沒江沈沈西樓殊未曉
寰宇記云鳴玉溪在州西十里有懸岩瀑布高
五十餘丈潭洞幽邃古木蒼然前刺史房式嘉其幽
絕特置蘭若凡有五橋以渡長慶集云鳴玉溪上木
蓮穠茂元和十四年夏命道士母丘元志寫之本志
云溪在治西二里發源西厓水聲如珮玉其旁有古
刻亦名酉溪又云西北五里有木蓮洞宋錢求之詩
云鳴玉溪邊堪寓目木蓮洞下更關情忠州好景無
人說祇得孤城小市名今治內有木蓮樓相沿其名
非故處也 龍昌有上寺下寺俱唐建在西山頂者

爲上寺卽巴臺寺也與翠屏山相對故云可以望江
南志謂之巴子臺巴子所築也唐宋詩刻存焉下寺
卽治平寺寰宇記曰龍昌寺在臨江縣東今爲治平
寺白公嘗於寺旁植柳柳盛則寺興柳衰則寺廢寺
僧愛此柳比之甘棠 白傅登城東古臺詩迢迢東
郊上有土青崔嵬不知何代物疑是巴王臺巴歌久
無聲巴宮沒黃埃志云巴王廟在州東一里神卽蔓
子將軍也歲三月七日太守以豕帛致祭先期土人
具千鈞蠟祠之宋爲永順祠今爲忠貞祠 王象之
碑目云漢丁房雙石闕在巴王廟前按左闕高可二

丈覆以飛甍層觀最上琢雙扉一美人現半身倚立
中層琢車馬人物旁刻文螭糾蟠長可三四尺金石
古文云此漢畫之始也正面漢隸十行行三十字強
半剝落惟漢都尉丁房五字相聯可讀它無恙者尙
三十二字闕陰鐫云紹聖丁丑五月戊午知忠州軍
一事齊國王闢之軍事推官荆南李鑑兵馬監押維
陽田缺巡檢安化楊中孝監稅濟南蓋犧逸錄事高
陽張復臨江縣令竟陵張微司戶參軍陽安文同司
理參軍雲安常彥臨江縣主簿東武缺同遊永順王
祠坐東軒面巴峽臨岷江望東溪之龍潭崇山峻嶺

激湍清流真山陰之蘭亭也於是賦詩酌酒極一時
適將歸共觀石闕之上讀漢都尉丁房碑欲重加刊
刻而文字磨滅竟不可辨相與嘆息而去右邊闕就
圯近日爲有司者新之了非故物 巴臺下江中有
石圓光如鏡旁有五石笋簇之呼爲仙人照鏡臺
勝覽云東坡在南賓郡圃有亭名東亭白公詩綠樹
爲閑客紅蕉當美人又何處慙慙重回首東坡桃李
種新成又最憶東坡紅爛熳野桃山杏水林檎蘇子
瞻東坡之號實始於此其詩云平生自覺出處老大
粗似樂天非東坡之名偶企同也 志云東澗在治

西開元寺側亦樂天時鑿公有東澗種柳詩云野性
愛栽植植柳水中坻三年未離郡可以見依依 水
經曰江水又逕虎鬚灘灘水廣大夏斷行旅今州西
二里有石梁三十餘丈橫截江中俗呼倒鬚灘卽其
處 輿地碑曰唐土洲有貞元十七年段文昌撰耆
老思舊碑有唐刺史房公式善狀碑志云唐土洲在
治西五十里有景德寺善狀碑立在普甯院中 水
經曰江水又東注黃華水口左逕石城南志云卽黃
華洲在東五十里江浦週迴可二十里碑目云有宋
忠州貢院碑參軍安元白立金魚堡碑陞忠州爲咸

涪府碑俱在此洲上咸涪碑詔文勅門下皇天畀付
有家敢怠繼承之敬乾元首出庶物聿懷潛躍之初
念聖考之貽謀擇价藩而錫履嚴陵龍水之鎮受節
齋壇永嘉忠南之封分茅主社睠言屏翰之重允協
謳歌之歸漢輿地之上圖若規先憲周舊邦之新命
竝錫府名以壯萬年之觀亦尙一人之慶其改陞溫
州爲瑞安府嚴州爲建德府宣州爲慶遠府忠州爲
咸涪府咸涪元年八月二十九日午時急速按寰宇
記石城在臨江縣東百里岷江之北岸李雄之亂巴
西郡託理于此城四面懸絕亦謂之巴子城 華

陽記曰臨江縣有鹽官在鹽涂二溪一郡所仰按涂
溪在州東八十里發源蟠龍洞來經涂井井神爲漢
楊伯起井廟碑云神嘗刺史荊州遡江至此憇于南
城寺謂人曰江北二三里閒安得有寶氣耶至蟠龍
洞見周柱下史丹爐曰此地有龍無虎宜其丹不就
也至涂山見白鹿飲泉曰寶氣在此矣土人從所指
處鑿磬石而得鹽泉廟在治東一里志云東南八十
里方斗山以形名也山有龍洞其神號方斗龍王所
謂涂山與蟠龍洞者此是又云東二十里香爐碓北
有石碑云處士楊佐墓漢楊伯起之裔孫 南山卽

翠屏也在對岸二里山中有禹廟陸宣公墓玉虛觀朝真洞望夫臺仙履迹諸勝白傳作樓以望之其詩云江上新樓名四望東南西北水茫茫又有望南山寄行簡詩臨江一嶂白雲閒紅綠層層錦繡斑不作巴南天外意何如昭應望驪山 輿地碑曰禹廟有唐碑字畫漫滅不可讀宋碑乃張俞作杜甫詩云禹廟空山裏秋風落日斜荒庭垂橘柚古屋畫龍蛇雲氣噓青壁江聲走白沙早知乘四載疏鑿控三巴度禹廟緣山行可里許爲玉虛觀輿地碑目云玉虛觀有唐人修建碑四方輿勝覽云玉虛觀南三十步有

陸宣公墓舊經陸宣公贊藁葬于此或曰宣公已歸葬樵李忠南特虛塚耳然子美已歸葬偃師而未陽之墓自若太白已移殯青山而采石之塚猶在則敬輿此墓宜封植之矣玉虛亦名紫極觀 通志云忠州南十里有望夫臺未詳其事按東坡忠州望夫臺詩云山頭孤石遠亭亭江轉船回似石屏可憐千古長如昨船去船來自不停浩浩長江赴滄海紛紛過客似浮萍誰能坐待山月出照見寒影高伶俜 本志仙履跡石在治北八十里相傳昔有真人立此飛昇今足跡尙存宋秦東詩仙人雙赤腳踏石如踏泥

泥痕尙可沒石痕不可迷 杜甫嘗居龍興寺有題
院壁詩云忠州三峽內井邑聚雲根小市常爭米孤
城早閉門空看過客淚莫覓主人恩淹泊仍愁虎深
居賴獨園陸游龍興寺弔少陵寓居詩中原草草失
承平戍火胡塵到兩京扈蹕老臣身萬里天寒來此
聽江聲註云寺門外江聲甚壯在州北八十里又二
十里有拔山寺與龍興寺俱漢永平閒建宋馮時行
寶華寺詩宿雨初收草木濃羣鴉飛去法堂空長廊
無事僧歸晚盡日門前只看松卽漢之普明寺也已
上三寺志云在州北九十里 志云東北三十里大

成寺漢初平建西北四十里寶珠寺晉永和建西北
百里雙龍寺唐貞元建張詠雙龍寺詩未踏陽關已
見山木鯨時吼翠微閒老僧隨隊看雲起居士忘緣
共鶴閒入眼煙光依砌濕倚空霧氣遶山環三朝寶
訓神明護大讀經章祝玉顏

酆都縣

水經曰江水又逕東望峽東歷平都註謂峽對豐民
洲舊巴子別都也華陽國志巴子雖都江州或治平
都卽此續漢書永元二年分枳置平都取界內平都
山爲名 方輿勝覽云自酆都縣東行二里許始登

山石徑縈迴可一二里平瑩如掃林木還茂夾逕翠栢黃葛殆萬株有數十株是千年物此卽平都山也

酈道元曰平都有天師治兼建佛寺甚清靈道書號爲平都福地輿地紀勝云仙都觀在平都山唐建宋改景德又名白鶴觀有陰長生詩天成四年書也通攷云陰真人祠刻詩三章乃貞元中刺史李貽孫書元豐四年轉運判官許安世過祠下閱石定爲陰仙之作乃屬知夔州吳師孟書石送置觀中詩見神仙記 百川學海云治平末蘇東坡泝峽泊舟仙都山下道士持陰長生石本金丹訣就質眞贗東坡答

曰不知也然士大夫過此必以請久久自有知之者按古今詩謠云蜀道觀中溲井得一碑其文曰有物有物可大可久採乎蠶食之前用乎火化之後成湯自上而臨下夸父虛中而見受氣應朝光功參夜漏白英聚而雪慚黃酥凝而金醜轉制不已神趨鬼驟金歟玉歟天年上壽無著於文訣之在口此卽陰仙所著丹訣也 勝覽云陰長生以延光元年於平都山白日昇天山頂五雲洞中嘗有雲氣從丹井中出洞有五雲樓壁上瑤池樂部四字段文昌書 輿地碑目云仙都觀有二仙公碑李虔撰二仙銘薛湜撰

俱景雲二年立陰真人景堂碑王真人碑俱李吉甫撰貞元年立其石瑩潤而白號爲玉石碑又有商比干銅盤銘開元間掘自偃師縣翻刻于此文曰右林左泉後岡前道萬世之銘茲焉是寶又有中和元年忠州刺史陳侁三官碑丞相段文昌修觀碑段少監修齋記天尊石像記老君石像記張大理詩杜光庭石函記按今皆不存志云總真羣仙之府道山洞天等刻或隸篆或真行大徑尺呂純陽書見存純陽登平都有訪仙詩云孟蘭清曉過平都天下名山總不如兩口單行誰解識王陰空使馬蹄虛又云一鳴

白鳥出青城再謁王陰二友人口口惟言三島樂擡眸已過洞庭春宋蘇軾詩足躡平都古洞天此身不覺到雲閒擡眸四顧乾坤闊日月星辰任我攀又平都天下古名山自信山中歲月閑午夢任隨鳩喚覺早朝又聽鹿催班蘇轍詩山前江水流浩浩山上蒼蒼松栢老舟中去客日紛紛古今換易如秋草空山樓觀何崢嶸真人王遠陰長生飛符御氣朝百靈悟道不復誦黃庭龍車虎駕下來迎去如旋風轉太清真人厭世不回顧世閒生死如朝暮學仙度世豈無人殮霞絕粒常辛苦安得獨從逍遙君冷然乘風駕

浮雲超世無有我獨行范成大詩云神仙得者王方
平誰其繼之陰長生飄然空飛五雲輶上賓寥陽留
玉京石爐丹氣常夜明麗光萬栢森千齡峽山偃仄
岷江榮洞宮福地古所銘云有北陰神帝庭太陰黑
簿囚鬼靈自從仙都啟巖扃高霞流電飛伏精暉景
下墮爍九冰塞絕苦道升無形至今臺殿棲岑嶰隋
坊唐堊留丹青十仙怪奇溪如清瑤池仙仗紛娉婷
琅瑯赴節鏘欲鳴我來秋暑如炊蒸汗流吁氣扶枯
藤摩挲眾蹟不暇評聊記梗槩知吾曾 段文昌修
平都觀記云平都山最高頂卽漢時王陰二真人蟬

蛻之所也峭壁千仞下臨湍波老栢萬株上插峰頂
靈花綵羽皆非圖志中所載者昏旦萬狀信非人境
貞元十五年余西遊岷蜀停舟江岸振衣虔潔詣諸
洞所石巖靈竇蒼然相次苔龕古書依稀可辨時與
道侶數人坐於下須臾天籟不起萬竅風息山光耀
於耳目煙霞拂於襟袖相顧神竦若在紫府玄圃矣
牽於行役不得淹久瞻眺惆悵書名而去邇來已三
十四年太和庚戌歲自淮南移鎮荆門有客由峽中
來者皆言當時題記文字猶在觀宇歲久臺殿荒毀
不三數年必盡摧沒於巖壑矣乃捨一月秩俸俾令

修葺子來同力浹旬報就去年冬十一月詔命換麾
幢再領全蜀沂三峽歷舊遊依然景物重喜登覽聞
泉聲而緩步愛松色而難別遂命筆硯志於巖谷時
太和七年正月五日 道經云老子騎青牛度函谷
將息駕于平都今縣二里有青牛山在平都之左
方輿勝覽云景德觀前鹿麕時出沒林閒與人狎志
云自平都西去一里林樹叢密者白鹿山也霏雪錄
云蘇老泉將遊仙都觀知縣李長官云故知君之將
至也問何以知之曰此山巨鹿鳴輒有客至屢驗輒
未一失老泉亦嘗爲人言之東坡白鹿山詩云日月

何促促塵世苦拘束仙子去無踪故山遺白鹿仙人
已去鹿無家孤悽悵望層城霞至今聞有遊仙客夜
來江浦叫平沙長松千樹聲蕭瑟仙客去人無咫尺
夜鳴白鹿安在哉滿山秋草無踪跡山之翠微有玉
鳴泉響作琴音清澄玉色其麓有流杯溪溪凡七出
相傳平都之仙常燕集于此 華陽國志巴子又立
市於龜亭北岸今新市里是也水經注曰平都縣有
市肆四日一會東坡詩我生飄蕩去何求再過龜城
歲五周身行萬里半天下僧臥一菴初白頭題云過
石龜山作也舊志石龜山在縣東五十里其下有村

墟 志云縣在豐民洲登平都山望岷江西來繞之而去其支流派別名爲溪者可得而數焉根溪在治東山上有魏國夫人墓未詳年代葫蘆溪在西南邃窈莫測蛟龍是宅青螺綠髻上下相映志謂之月鏡潭也碑溪以古碑名不知何代物去縣稍遠望途溪在古南賓縣地今爲南賓里舊屬忠州鄰石砮司志又云龍渠縣今名縣壩屬散毛宣撫司縣有引藤山出藤大如指可以吸酒白樂天詩閑拈蕉葉題詩句悶折藤枝引酒嘗亦近南賓界 愚按豐民洲在平都山下隋兩取之以名縣自豐旁加邑而羅豐地

府之說始行今引真誥廣記二文附此真誥曰羅豐山在北方癸地註此癸地未必以六合言當是於中國指向正在幽州遼東之北北海之中去岸不知幾千萬里又曰六天宮是鬼神六天之治也洞中六天宮亦同名相像如一世有知酆都六天宮門名則百鬼不敢爲害陶弘景曰此應是北酆鬼王決數罪人住處其神卽經所稱閻羅王 太平廣記曰東都豐都市在長壽寺之東北初築市垣掘得古塚土藏無塹壁棺木陳朽觸之便散屍上著平上幘朱衣得銘曰筮道居朝龜言近市五百年間于斯見矣當時達

者參驗是魏黃初二年所葬也然范成大詩云有北
陰神帝庭太陰黑簿囚鬼靈則鄴都之說亦不起于
近代

墊江縣

唐通典曰魏恭帝始置忠州墊江縣後周改名魏安
隋開皇十八年復爲墊江蔡松年南史補曰漢之墊
江今之合州也合州置自西魏及隋煬帝改合州爲
涪陵郡於是移墊江之名于桂溪縣桂溪溪旁多桂
樹也縣以樹名寰宇記曰桂溪縣有清水有容水在
桂溪南三里清水唐縣名猶開州之清濁二水矣縣

又有鹽溪今治北小溪上有古碑乃宋淳熙中物
孟康註地理志曰墊江之墊音重疊之疊晉太康地
記曰墊江因李雄之亂移置于陽關陽關未詳疑卽
陽關爲三關之一 碑曰會仙洞勝在治北四十里
之鳳凰山李太白書羅王洞勝在治北五十里之西
山李唐勅賜也按西山磐石上有巨人迹或羅王勝
之始名 志云東北二十里有古寺曰秋月禪關唐
馬祖修淨之所卽峰頂山也又二十里有古洞飛湍
喧豗如雷聲聞十餘里久晴聞之則雨久雨聞之則
晴 段氏遊蜀記曰忠州墊江縣以蘇薰爲席絲爲

經其色深碧 渝志云明玉珍僭號以墊江爲雞鵝
食邑亦猶巴子以東突硤爲畜牧沮云

蜀中名勝記卷之十九終

蜀中名勝記卷之二十

閩中曹學佺能始著

遵義道

遵義府 遵義縣附郭

漢書唐蒙上書說武帝曰竊聞夜郎國所有精兵可
得十萬浮船牂柯出其不意此制越一奇也上乃拜
蒙爲中郎將從巴筏關入見夜郎侯厚賜諭以威德
約爲置吏夜郎旁小邑皆貪漢繒帛以爲漢道險終
不能有也迺且聽蒙約還報乃以爲犍爲郡發巴蜀
卒治道自犍道指牂柯江司馬相如又往諭意皆不

聽命數反叛及南越反上使馳義侯同犍爲發南夷
兵且蘭君乃反殺使者會越已破引兵誅且蘭遂平
南夷 唐詩云天下山河之象在乎兩戒南戒自岷
山迤邐及北地上郡西南至巴蜀漢中東及牂柯今
遵義之區雖四塞爲固而襟帶之脈則牂柯江水矣
郡志云碧雲峯在治西四峯並峙中央迥出青碧
如雲按神君張亞播州玉皇碑云城西碧雲峯下公
府西北隅爇行清勝隱然神仙窟宅 志又云城外
桃源洞石乳天垂見者眩目沈德元詩云亭跨桃源
石溪山眞美哉笑同今日上醉去幾時來環野誰堪

據寸心當自裁丈人千古意倚望一銜杯後人因立
美哉亭 四彝傳宋淳熙中遷遵義軍於穆家川志
云穆家川源出龍巖山流經湘山一名湘川李白詩
云洛陽才子謫湘川元禮同舟月下仙記得長安還
一笑不知何處是西天白詩又云石笋如掉筆懸于
山之顛誰謂不平者與之書青天志云金樓山闕石
笋參天是白題詩處也 志云海龍園爲楊酋穴壘
在治北三十里四面斗絕後有側徑畧一線今居人
尙不知通於何所故老相傳昔白龍太子據此今爲
白龍寺又城外福光寺有銅佛像初人見之荒莽中

欲取者數風雷輒作不敢近有異僧率土人齋戒乃得今在寺中又有龍山鐘黑達樹皆異物也播平鐘爲水西持去樹猶存 志又云城北門有廖孝廉故宅城東郭有二冉故宅西北有苗齋郎故宅按齋郎太廟執事之官也人代未詳寰宇記謂齋郎水源出蒿芟里楚米陂經小溪里入瀘江本此二冉宋末播州名士冉璉冉璞也有文武才前後辟召皆不赴余玠安撫四川築招賢館兄弟往謁玠與分庭抗禮久無所試使人窺之惟相對據地以堊畫地爲山川城池狀因獻城釣魚山之策者廖孝廉事不可考 寰

宇記云貞觀九年分牂柯北界置郎州領恭水高山貢山柯盈邠施釋鷲六縣十一年省十三年又於其地置播州取播川爲名仍復六縣其明年改恭水爲羅蒙縣高山爲舍月縣貢山爲胡江縣柯盈爲帶水縣邠施爲羅爲縣釋鷲爲胡刀縣十六年又改羅蒙爲遵義縣二十年以夷州之芙蓉瑯川二縣來屬顯慶五年廢舍月胡江羅爲三縣景龍三年陞播州爲都督府先天二年罷天保元年改爲播川郡乾元元年復爲播州 寰宇記云畚陵山在遵義縣東四十里夷牢水西自帶水縣來東流經縣北一里又屈

曲南流八癩胡刀縣界帶水源出舊縣西大山東流
經帶水縣城北又東流至癩胡刀界注胡江水按唐
永徽中癩帶水縣在府北三十里宋大觀建遵義軍
於白綿堡亦在府北三十里似同一地 隋楊素贈
薛播州詩凡十四首即薛道衡也汾陰人少孤專精
好學甚著才名隋高祖除爲內史累遷上儀同其爲
播州疑在煬帝之世詩云在昔天地閉品物屬屯蒙
和平替王道哀怨結人風麟傷世已季龍戰道將窮
亂海飛羣水貫日引長虹干戈異革命揖讓非至公
又兩河定寶鼎八水域神州函關絕無路京洛化爲

丘漳滏爾連涖涇渭余別流生郊滿戎馬涉路起風
牛班荆疑莫遇贈綺竟無由又五緯連珠聚千載濁
河清金亡潛虎質閨盡自蛙聲聖期伊旦暮天祿啟
炎精霧生三日重星飛五老輕禋宗蒼上帝改物創
羣生又道昏雖已朗政故猶未新剡舟涸水際結網
大川濱出遊迎釣叟入夢訪幽人植林雖各樹開榮
豈異春相逢一時泰共幸百年身又東帛賁丘園生
芻自幽谷塵芳金馬路瀾清鳳池澳零露旣垂光清
風復流穆傾蓋如舊知彈冠豈新沐利心金各斷芬
言蘭共馥又自余厯端揆緝熙慝時彥及爾陪帷幄

出納先天睠高調發清意縛藻流餘絢或如彼金玉
歲暮無凋變於松待爾心爾筠留我箭又荏苒積歲
時契闊同遊處聞闔既趨朝承明還宴語上林陪羽
獵甘泉侍清曙迎風含暑氣飛雨淒寒序相顧惜光
陰留情共延佇又滔滔彼江漢實爲南國紀作牧求
明德若人應斯美高臥未褰帷飛聲已千里還望白
雲天日暮秋風起峴山君儻遊淚落應無已又漢陰
政已成嶺表人猶蠹借寇北方新還珠總如故楚人
結去思越俗歌來暮陽鳥尙歸飛別鶴還迴顧君見
南枝巢應思北風路北風吹故林秋聲不可聽雁飛

窮海寒鶴唳霜臯淨含毫心未傳聞音路猶覓唯有
孤城月徘徊獨臨映弔影余自憐安知我疲病又養
病願歸閑居榮在知足棲遲茂陵下優遊滄海曲古
人情可見今人遵路躅荒居接野窮心物俱非俗桂
樹方叢生山幽竟何欲又所欲棲一枝稟分豐諸已
園樹避鳴蟬山梁遇時雉野陰冒叢灌幽氣含蘭芷
悲哉暮秋別春草復萋矣鳴琴久不聞屬聽空流水
又秋水魚遊日春樹鳥鳴時濠梁莫共往幽谷有相
思千里悲無駕一見杳難期山阿散瓊蘂庭樹下丹
墀物華不相待遲暮有餘悲又銜杯向南浦寒色黯

沈沈風起洞庭險煙生雲夢深獨飛特慕侶寡和乍
孤音木落悲時暮時暮感離心離心多苦調詎假雍
門琴 唐韓愈作栲宗元墓誌畧云初子厚自栲州
召至京師而復爲刺史也中山劉夢得禹錫亦在遣
中當詣播州子厚泣曰播州非人所居而夢得親在
堂吾不忍夢得之窮無辭以白其大人且萬無母子
俱往理請於朝將拜疏願以柳易播雖重得罪死不
恨遇有以夢得事白上者夢得於是改刺連州嗚呼
士窮乃見節義今夫平居里巷相慕悅酒食遊戲相
徵逐詡詡疆笑語以相取下握手出脯肝相示指天

日涕泣誓生死不相背負真若可信一旦臨小利害
僅如毛髮比反眼若不相識落陷穿不一引手救反
擠之又下石焉者皆是也此宜禽獸彘狄所不忍爲
而其人自視以爲得計聞子厚之風亦可以少愧矣

桐梓縣

華陽國志夜郎郡古夜郎國也屬縣二千戶治夜郎
縣有遯水通廣鬱林有竹王三郎祠甚靈響劉敬叔
異苑云漢武帝時夜郎竹王神者名興初有女子浣
於遯水見三節大竹流入足間推之不去聞其中有
號聲持破之得一男兒及長有才武遂雄獠獠氏自

立爲夜郎侯以竹爲姓所破之竹棄於野卽生成林
王嘗與從人止石上命作羹從人曰無水王以劔擊
石泉便湧出今竹王水及破竹成林並存 後漢使
唐蒙開牂柯郡斬竹王首夔獠咸訴以竹王非血氣
所生甚重之求爲立後太守吳霸以聞帝封三子爲
侯死配食父廟今夜郎縣有竹王三郎祠是其神也
本志云夜郎里有竹王洞是其故處 九州要記云
夜郎自古非臣服州郡之地昔漢武帝開拓南邊始
置夜郎縣 後漢書曰夜郎者臨牂柯江江廣百餘
步足以行船唐蒙發巴蜀卒治道自犍道抵牂柯江

卽此地十三州志云牂柯者江中山名晉永嘉二年
分牂柯置夜郎郡兼置充州寰宇記唐武德二年以
梓潼縣爲充州開元十五年改爲夜郎縣又云充州
故夜郎侯邑牂柯都尉居之南中八郡悉夜郎之西
陲也其屬縣有梓潼思王思渝底水按梓潼卽今之
桐梓縣 志云編戶夜郎里有李太白故宅白
坐永王璘之禍南流於此按蔡寬夫詩話云太白之
從永王璘世頗疑之唐書載其事甚略亦不爲明辨
其是否獨其詩自序云半夜水軍來潯陽滿旌旛空
名適自誤迫脇上樓船從賜五百金棄之若浮煙辭

官不受賞翻謫夜郎邊以此觀之則太白豈從人亂者哉 太白集有流夜郎題葵葉云慚君能衛足歎我遠移根白日如分照還歸守故園其流夜郎聞酺不預詩云北闕聖人歌太康南冠君子竄遐荒漢酺聞奏鈞天樂願得風吹到夜郎寄內詩云夜郎天外怨離居明月樓中音信疏北雁春歸看欲盡南來不得豫章書流夜郎贈辛判官云管在長安醉花柳五侯七貴同杯酒氣岸遙凌豪士前風流肯落他人後夫子紅顏我少年章臺走馬着金鞭文章獻納麒麟殿歌舞淹留玳瑁筵與君自謂長如此甯知草動風

塵起函谷忽驚胡馬來秦宮桃李向胡開我愁遠謫夜郎去何日金雞放赦回寄韋南陵水云胡驕馬驚塵沙起胡雛引馬天津水君爲張掖近酒泉我竄三巴九千里天地再新法令寬夜郎遷客帶霜寒西憶故人不可見東風吹夢到長安竄夜郎憶秋浦桃花舊遊云桃花春水生白石今出沒搖蕩女蘿枝半挂青天月不知舊行徑初拳幾枝蕨三載夜郎還於茲煉金骨又夜郎承恩放還兼欣克復京師示息秀才云黃口爲人羅白龍乃魚服得罪豈怨天以愚陷網目鯨鯢未剪滅豺狼屢翻復悲作楚地囚何日秦庭

哭遭逢二明主前後兩遷逐去國愁夜郎投身竄荒
谷半道雪屯蒙曠如鳥出籠遙欣克復美光武安可
同天子巡劔閣儲皇守扶風揚袂正北辰開襟攬羣
雄胡兵出月窟雷破關之東左掃因右拂旋收洛陽
宮回輿入咸京席卷六合通叱咤開帝業手成天地
功大駕還長安兩日忽在中一朝讓寶位劔舄傳無
窮媿無秋毫力誰念矍鑠翁弋者何所慕高飛仰冥
鴻棄劔學丹砂臨爐雙玉童寄言息夫子歲晚陟方
蓬 唐李嘉祐送上官侍御詩莫問黔中路令人到
欲迷水聲巫峽裏山色夜郎西張籍送蠻客詩借問

炎州客天南幾萬程江南惡溪路山遙夜郎城按志
夜郎城在桐梓驛二十里有碑坊字已剝蝕明揚慎
元夕桐梓驛詩云載石孤峯古驛門青羌吹笛報黃
昏三家村裏無燈火千樹梅花作上元夜郎曲云夜
郎城桐梓源東堞壘平村民如野鹿猶說翰林名夜
郎溪槃木陰中半景西漁舟投樹宿水鳥遶花啼夜
郎歌漢宮曾取教秦娥竹枝傳竊糾楊柳轉猗儻
志云夜郎里有癡扶歡縣址按寰宇記扶歡縣唐貞
觀十七年與榮懿縣同置以縣東扶歡山爲名也屬
溱州唐書貶韓偓爲榮懿尉即此地又有癡溱溪郡

按寰宇記溱州土地所屬與夔州同亦貞觀十七年置天寶元年改爲溱溪郡志又有廢鼎山縣在治西十里不知何代設城壘猶存

仁懷縣

寰宇記云芙蓉縣唐貞觀五年置屬邠州尋屬牢州十六年牢州廢改屬夔州又改屬播州初置在芙蓉山上後移於縣東南三里之芙蓉江側此芙蓉縣之所由名也 寰宇記又云仁水在縣西南一里東南流注邠水志云仁水在宣慰司東南五十里此仁懷縣之所由名也 圖經云廢舍月縣在州東南九十

里唐貞觀九年於縣治置高山縣旋改爲舍月縣以界內舍月山爲名涪陵江在其東九十里 廢胡江縣在州東南四十里貞觀九年於縣置貢山縣旋改爲胡江縣以界內胡江爲名有巴水在其南三十四里 廢羅爲縣在縣西南二百里貞觀九年置邠施縣旋改爲羅爲縣以界內羅爲水爲名水源自縣西百里羅爲山出流經縣南又東流至胡江入涪陵 顯慶五年廢城址猶存 廢胡刀縣在縣西南五十里貞觀九年置釋鷺縣旋改爲胡刀縣因胡刀以爲名水在縣南一里東流合胡江開元二十六年廢

真安州

圖經云本夷州之境與黔思犬牙其地山溪竦秀岡巒連綿竹樹茂林千里不絕物產頗饒與渝之南川武隆彭水相接壤 寰宇記云唐貞觀十七年廓闢邊彝置播州鎮後因其處有降珍山乃以鎮爲珍州取名山也長安四年改舞州開元十三年又改鶴州十四年復爲珍州宋乾德四年刺史田遷上言自給賜珍州郡名以來連遭火災乞改州名詔改爲高州尋以嶺南有高州加西字元復爲珍州僞夏明玉珍避諱因改爲真州 圖經云唐太宗開山洞始置珍

州時并置夜郎麗臯樂源三縣寰宇記云其縣并在州側近或十里或二十里隨有畚田處爲寄理移轉不定方輿云珍州有麗臯白厓思義安定壽山五堡官軍所駐也夜郎今桐梓縣樂源廢縣在治西六十里有樂道書院漢尹珍建又云尹珍以俗敦稼穡併建務本堂 紀勝云珍州有東松西松豹子羅蒙四山按二松俱在州南三百二十五里豹子在州北八里山多產豹羅山在州西南三百里內唐志有羅蒙縣言此山高遠可瞰羅蒙也 勝覽云三江者去州三十里即明溪又曰虎溪在州東十七里思溪在州

西北百八十里出南平軍與明溪合又有貫珠溪按
在今治西八十里源出虹轉山下屈曲會合三江
志云楊六郎寓白鳩亭亭在古城其憩休處在三
塊石足迹猶存按六郎宋太原楊業之子楊延昭也
事跡不可攷又云僞夏僭號其將江中立築城以守
舊州城是也眞州將鄭昌孫據石城抗之今南山寨
是也宋兵初至昌孫執中立以獻命得世其地按
平播之後眞州始加安字州判官有鄭駱二姓鄭即
昌孫後也駱氏未詳方輿勝覽云宋徽宗時大駱解
上下族帥駱世華駱文貴等獻地立珍州亦曰樂源

郡或卽駱之始云

綏陽縣

寰宇記云夔州義泉郡治綏陽縣在漢爲牂柯郡境
歷代恃險不聞臣附隋大業七年始受招慰置綏陽
縣屬明陽郡今甯夔縣西北八十里舊明陽郡是也
唐武德四年罷郡置夔州於思州甯夔縣領夜郎神
鳳豐樂綏養雞翁伏遠明陽高富甯夔思義丹川宣
慈慈岳十三縣六年廢雞翁縣貞觀元年廢夔州仍
省夜郎神鳳豐樂三縣以伏遠明陽高富甯夔思義
丹川六縣隸務州宣慈慈岳二縣隸溪州綏養縣屬

智州四年於黔州都上縣復置夔州六年復分置雞
翁縣十一年以義州之綏陽黔州之高富二縣來屬
其年又自都上縣移於今治領綏陽都上高富雞翁
四縣十七年又以廢牢州義泉洋川二縣來屬天寶
元年改爲義泉郡乾元元年復爲夔州按今貴州石
阡府所轄多係夔州地以綏陽爲舊治所故詳及之
圖經綏陽縣有波利山在北二十里有安徽水一
名孤微水西自綏養故縣來東流經縣南八里又東
入都上縣界涪江水在縣東十八里南流注安徽水
方輿云綏陽故城在今縣西三里貞觀十二年移

於今治廢城存按縣志今綏陽又移治觚竹里在眞
州長官司西北二百五十里外 志云縣北十里碧
霄洞澗數十丈懸石嶙峋天成萬態如刻如畫又二
十里有三張水卽羅甘溪也其源出於古井每日辰
午申三潮不爽焉 古蹟攷云趙家里之望魚樓旁
有三撫墓按楊曾家廟碑三撫姓趙氏鄱陽人乾符
初播有白龍太子之亂其父當寨團練使偕楊祖平
之遂插草爲標於杉木堂入籍而生三撫旣長有神
異讀書於趕水鎮嘗騎馬歸羈下拖砂石兩片今趙
廟前上馬礮是也刻有壬戌年等字墓在廟後二十

蜀中名勝記 卷之二十一
丈許有隙可窺見其槩以鉤懸去地二尺許 古蹟
考云朗水里之溪源地有柳宗元書院按子厚以柳
易播尙未得請不知何以有祠曰重其義也 志云
宋大觀初於綏陽縣置承州廢都上縣在其南二十
五里廢義泉縣在西南百里廢洋川縣在西北百里
寰宇記云都上縣隋置唐武德元年屬黔州貞觀
四年置夔州縣爲治所十一年州始移綏陽有涪水
一名泝野水西北自綏陽縣界流入經縣西十四里
又折西南流入費州雞翁縣界 義泉縣本牂柯地
隋大業十一年置初屬明陽郡唐武德二年改屬義

州貞觀十一年於縣治置牢州十七年牢州廢縣屬
夔州有支離水東北自廢綏養縣流入流經縣西又
東南流入廢樂安縣界 洋川縣亦牂柯地武德二
年於縣東北七十里置屬義州貞觀元年改屬思州
開元二十五年屬夔州有小水西南自廢高富縣流
入東北經縣七十里又北入務川縣界 甯夔縣舊
屬思州開元二十五年屬夔州 廢高富縣在今州
東北百里隋大業七年於廢縣南三十里置屬明陽
郡永年陷夔獠唐武德四年再置屬夔州貞觀元年
改屬務州十年又改屬黔州十一年復屬夔州有小

水在其縣南三十里東入甯彝縣界 廢雞翁城在縣西南七十里武德四年置屬彝州有泝野水東自都上縣界流入經縣南三里又南入費州城樂縣界永徽後與高富縣同廢

蜀中名勝記卷之二十一

蜀中名勝記卷之二十一

閩中曹學佺能始著

下川東道

夔州府一

奉節縣附郭

水經曰江水又東逕南鄉峽東寰宇記云南鄉峽在奉節縣西四十七里龍洞溪出焉按即今之龍窠候館 梁元帝早發龍窠詩征人喜放流曉發晨陽隈初言前浦合定覺近林開不疑行舫動惟看遠樹來還瞻起漲岸稍隱陽雲臺 經云江水又東逕永安宮南註云劉先主終於此諸葛亮受遺處也其間平

地可二十許里江山迥闊入峽所無城周十餘里背山面江頽墉四毀荆棘成林左右民多墾其中郡國志曰劉備改魚復爲永安仍於州西七里別置永安宮城在平地陸游入蜀記云二十七日早至夔州州在山麓沙上所謂魚復永安宮也宮今爲州倉而州治在宮西北甘夫人墓西南景德中轉運使丁謂薛顏所徙比白帝頗平廣然失關險無復形勢按寰宇記云周武帝天和元年自白帝城移治於永安宮南五十步宣政元年復還白帝城中志云郡有義泉諸葛武侯所鑿侯慮城中無水乃接筒引泉入城後

夔守亡藝以榷水取錢至宋待制王龜齡罷之陳剛鬣井記云夔惟節度府漕臺西廳有井紹興二年井大壞景公領使事發地二百尺而始及泉以柁木鬣之志云郡學即永安宮址固陵文類云郡守錢唐單夔同漕使濩澤張玠以紹熙元年六月初吉祇謁先聖先師因延肄業之士別駕漢嘉張子震郡文學三山柯甲皆在施萬大甯文學掾錢塘李廷光九華湯巖起三衢毛憲實與焉遂會食明道規廡一新見國子錄范仲黼經營之美因啜茗觀三峽圖聽水琴聲清話久之備然忘暑遐想詠歸之風名教之樂其

蜀中名勝記 卷二十一 二
有旣耶按柯甲跋云其字皆隸古體 碑目云少陵
遊蜀凡八稔在夔獨三年平生所賦詩凡千四百六
篇而在夔者三百六十有一治平中知州賈昌言刻
十二石於北園歲久字漫滅建中靖國元年運判王
遽新爲十碑今碑在漕司 北園卽瀼西果園也入
蜀記云地在瀼之西故一曰瀼西土人謂山間之流
通江者曰瀼杜甫暮春題瀼西新賃草屋詩久嗟三
峽客再與暮春期百舌欲無語繁花能幾時谷虛雲
氣薄波亂日華遲戰伐何由定哀傷不在茲其二此
邦千樹橘不見比封君養拙干戈際全生麋鹿羣畏

人江北草旅食瀼西雲萬里巴渝曲三年實飽聞其
三綵雲陰復白錦樹曉來青身世雙蓬鬢乾坤一草
亭哀歌時自惜醉舞爲誰醒細雨荷鉏立江獺吟翠
屏其四壯年學書劍他日委泥沙事主非無祿浮生
卽有涯高齋依藥餌絕域改春華喪亂丹心破王臣
未一家又將別巫峽贈南鄉兄瀼西果園四十畝詩
云苔竹素所好萍蓬無定居遠遊長兒子幾地別林
廬雜藥紅相對他時錦不如具舟將出峽巡圃念攜
鋤正月喧鶯未茲辰放鷁初雪籬梅可折風榭柳微
舒託贈卿家有因歌野興疏殘生逗江漢何處狎樵

蜀中名勝記 卷二十一
漁 郡有制勝樓卽北樓也宋張商英序云夔據荆
蜀往來之衝渝瀘施黔疆場之郡倚州爲重而頽垣
廢塹居民暮夜出入不禁殆非所以防微消患嚴宮
府壯屏翰之意也熙甯十年轉運副使董大夫請於
朝而新之知郡事王仲祥董其役遂負赤甲之固合
月臺之遺址而增築之建爲譙樓宏大煥聳凡山川
之形勝盡在目中大夫以制勝名之蓋慮深哉旣落
成諸公賡詩以記之將鏡於石以廣其傳於是金馬
張商英適西來爲之序云爾尙書司門郎中知軍州
事王延禧北樓詩云夔子城新築長江便作濠欲兼

諸面敵故起北樓高卽舊基仍峻因時力不勞青天
纔咫尺翠壁似周遭近照東西灤遙分上下牢百蠻
歸指掌三峽見秋毫帝道方無外皇威到不毛三鈎
閒夜鎖八陣縱春遨守土慙非稱提兵亦謬叨經營
皆使指備豫本戎韜功乏爲山助名加制勝褒登臨
欲吟咤深愧杜陵豪 方輿勝覽云白雲樓在計臺
有三層程之才序云漕舍據北山之麓西園錦石堂
又據漕之北地勢是最高歲久且敝因稍增築代以
重樓名其上曰白雲樓中曰秋濤閣下曰山堂登覽
之勝甲於一郡於其成也不可無紀輒吟詩一篇爲

作者前驅耳詩云鸞熊城郭遶蒼崖萬疊煙嵐亦壯哉平地窺覩心未愜重樓徙倚眼初開披襟風月爭新入剖目江山破迥來日落三峨知處所雲浮雙闕欲崔嵬胡牀不愧庾公興奕簞還思杜老才更待攜衾盡清景夜深欄檻逼昭回勝覽云江月亭在戎鈴司王龜齡詩長江何處水明月幾州天月與江無約相逢是偶然碑目云癸亥燈夕前一日臨川何異同叔招王鈇轄飲次日當用故事邀漕使鉅野李誠之同至江月亭鈇轄錄示梅谿舊題預有所請方辭以老罷無復強綴語言聊記歲月云爾是夕五鼓形

於夢寐得二十字其辭曰月湖湖上月到處有光輝既解相隨出當須照我歸覺而甚喜歸日可期既登茲亭水月相得愈切刀頭之夢故併書以遺之鈇轄名光遠字宏父是爲江月主人固陵文類云瑞白堂在治內郡守王十朋五月十五日夜與劉韶美草酌於瑞白堂秉燭觀跳珠分韻得跳字詩云五月峽中天氣歛竹筩引水那能澆江瀆龍老臥未起崖石不枯珠自跳草草杯盤對君酌燈前疑是簷花落毫端瀉出萬斛珠共向炎天作冰雹妃子名園荔子丹絳囊初摘堆金盤細擘輕紅唱君曲咀嚼水晶牙頰

寒老翁真箇如年少激水成珠堪一笑劉侯自有留
中珠不止照人兼自照劉儀鳳得珠字云別來世故
朝昏殊相與言之汗模糊兩翁得酒促坐席感深念
極氣欲蘇籀龍亦解作水供細繹尋文如渴烏衣巾
生秋背毛豎金石相應環佩趨江山豪壯傍尊俎醉
中頻貫纍纍珠此時一事復挂口爲樂未竟成暗鳴
夔州憂民困湯火潤澤有志無坦塗眼前焦熬十萬
戶欠伸戲笑皆霑濡自操量鼓入官廩不輸一錢分
水符讀書功力無表畔久矣俗吏輕吾儒 韶美有
自歸州陸行至夔州詩云久客歸心速江流設險艱

夢驚人鮓甕生出鬼門關草滿離騷國神依暮雨山
未平千古恨慘澹入躋攀又飛溜時時雨疏風處處
蟬草茵秋臥月雲幕雨垂天夷險籃輿底陰晴鳥道
邊荒村無勞酒坐睡媿頰肩又戶口村無幾犁鋤力
不堪林荒樗櫟壽月黑虎狼貪幽絕雲眠穩清閒谷
飲甘故山深未極壤斷蓋茅菴又倚伏關羣動幽微
各有生燒痕移窟穴林曲聚飛鳴瘠土常饑色層坡
被惡名輕行不唾地山好故留情又曠野無人宿危
亭犯雨過嶺雲堆屨屐剎海現兜羅酒觸秋懷壯天
留暮色多不勝行役苦裁入竹枝歌又行行夔子國

尺寸到江濱間濶一杯酒平生三故人逐臣猶費祿
夢境欲抽身脫粟羹藜覓重關任汝嗔自註云故人
謂龜齡元章行可也按韶美普州人性酷嗜書秘閣
板本抄錄殆遍親自校讎至杜門絕交爲人劾歸詳
見著作記及詩話中 經云江水又東逕諸葛亮圖
壘南註云石磧平曠望兼川陸有亮所造八陣圖東
跨故壘皆纍細石爲之自壘西去聚石八行行間相
去二丈因曰八陣旣成自今行師庶不覆敗皆圖兵
勢行藏之權自後深識者所不能了今夏水漂蕩歲
月消損高處可二三尺下處磨滅殆盡荊州圖副云

永安宮南一里渚下平磧上週迴四百一十八丈中
有諸葛孔明八陣圖聚細石爲之各高五尺廣十圍
歷然綦布縱橫相當中間相去九尺正中開南北巷
悉廣五尺凡六十四聚或爲人散亂及爲夏水所沒
冬水退復依然如故八陣圖下東南三里有一磧東
西一百步南北廣四十步磧上有鹽泉井五口以木
爲桶昔常取鹽卽時沙壅冬出夏沒劉賓客嘉話錄
云夔州西市俯臨江岸沙石下有諸葛亮八陣圖箕
張翼舒鵝形鶴勢聚石分布宛然尙存峽水大時三
蜀雪消之際瀕湧混濇可勝道哉大樹十圍枯槎百

丈破礧巨石隨波塞川而下水與岸齊人奔山上則聚石爲堆者斷不可也及乎水落川平萬物皆失故態唯諸葛陣圖小石之堆標聚行列依然如是者僅已六七百年淘灑推激迨今不動高似孫緯略曰八陣圖在魚復者隨江布勢填石爲規前障壁門後倚卻月縱八橫八魁容二丈內面偃月九六鱗差江自岷來奔怒湍激驚雷迅馬不足以敵其雄也徒華變滄不足以窮其力也磊磊斯石載轟載春知幾何年曾不一仄是非天所愛神所做者歟詩林載晉桓溫伐蜀觀八陣圖詩云訪古識其真尋源愛往跡恐君

遺事節聊下南山石仍顧謂從事曰此常山蛇勢也杜甫八陣圖詩功蓋三分國名成八陣圖江流石不轉遺恨失吞吳劉禹錫詩軒皇傳上略蜀相運神機水落龍蛇出沙平鵝鶴飛波濤無動勢鱗甲避餘威會有知兵者臨流指是非蘇軾詩平沙何茫茫髣髴見石蘊縱橫滿江上歲歲沙水齧孔明死已久誰復辨行列神明非學到自古不留訣至人已心悟後世徒妄說自從漢道衰蜂起盡奸傑英雄不相下禍難久連結驅民市無煙戰野江流血萬人賭一擲殺盡如沃雪不爲久遠計草草常無法孔明最後起意欲

掃羣孽崎嶇事節制隱忍久不決志大遂成迂歲月
去如瞥六師紛未整一旦英氣折唯餘八陣圖千古
壯夔峽蘇轍詩漲江吹八陣江落陣如故我來苦寒
後平沙如匹素乘高望遺迹磊磊六四數遙指如布
綦就視不知處世稱諸葛公用眾有法度區區落褒
斜軍旅無闊步中原竟不到置陣狹無所茫茫平沙
中積石排隊伍獨使後世人知我非莽鹵奈何長蛇
形千古竟不悟惟餘桓元子久視不能去李興宗詩
江從岷來觸瞿唐夏潦潰裂怒勢張霜濃水落洲渚
露纍纍江石堆作行半斜半直半疏密方營周匝門

東出相傳呵護有鬼神驚波不能移寸尺想見當年
諸葛公綸巾羽扇揮秋風令嚴部伍寂如水出沒變
化機無窮乾坤不足當經理寫留古法良岑趾上灘
下峽一千年多少英雄測元旨小兒元子強多知常
山蛇勢吾能窺灞上枋頭真絕倒空使虬髯論崛奇
斲輪不可傳其子此公天機緘骨髓奈何螟蝗生蝮
蝎爰劉已灰吹不起天教三馬食一槽老馬蹄嚙暫
咆哮渭陽巾幗勢將蹶大星夜隕西軍號嗚呼興廢
盡天意中原腥羶今六紀胡雛骨肉正相殘欲拯塗
炭嗟誰使大官酣燕芻參餘小官跼躅塵埃裏舉目

厭厭九泉人誰訪草廬談世事向來韜略機莫投而
今投機欠良籌君不見峽山深深茅舍底有人抱膝
高聲謳張纘陪安撫大卿登八陣臺覽觀諸葛公遺
像偶成長句云白帝城西魚復浦十月江平見津滸
當年纍石紛成行此地臥龍經講武轅門外建巖中
權列陣相承存後伍何人蛇勢識常山未數魚麗矜
鄭拒懸知精神貫金石尙想號令嚴鉦鼓老兵料敵
應疑生川后澄波其敢侮向令赤伏有餘符下睨皇
州直指取云何遺跡司神明獨斬豐功被寰宇高城
置酒共臨眺往事興懷增歎撫巍然王佐三代前信

矣名言照千古 舊經云八陣圖銘石刻在磧中今
不復見張秀長詩刻銘久伏水底碑教戰石存山下
鼓自註云有圖銘巨石今伏水底又云山下有石鼓
相傳爲武侯教戰之處也 志云先主廟舊在永安
宮南今移白帝城內杜甫謁先主廟詩慘澹風雲會
乘時各有人力侔分社稷志屈偃經綸復漢留長策
中原仗老臣雜耕心未已嘔血事酸辛霸氣西南歇
雄圖歷數屯錦江原過楚劔閣復通秦舊俗存祠廟
空山泣鬼神虛簷交鳥道枯木半龍鱗竹送清溪月
苔移玉座春閭閻兒女換歌舞歲時新絕域歸舟遠

荒城繫馬頻如何對搖落况乃久風塵孰與關張並
功臨耿鄧親應天才不小得士契無鄰遲暮堪帷幄
飄零且釣緡向來憂國淚寂寞灑衣巾 三山林栗
詩序云諸葛武侯祠舊在西山歲久摧圯永嘉王詹
事帥夔日移置陣磧涪熙漕使張著庭重修杜甫諸
葛廟詩久遊巴子國屢人武侯祠竹日斜虛寢溪風
滿薄帷君臣當共濟賢聖亦同時翊戴歸先主并吞
更出師蟲蛇穿畫壁巫覡醉蛛絲歛憶吟梁父躬耕
起未遲竇叔向武侯廟詩永安宮外有祠堂魚水思
深祚不長角立一方初退舍擬稱三漢更圖王人同

過隙無留影石在窮沙尙啟行歸蜀降吳竟何事爲
陵爲谷任蒼蒼 方輿勝覽云武侯廟在八陣圖之
臥龍山上時州理白帝故少陵詩云猶有西郊諸葛
廟臥龍無首對江濱中有堂曰開濟堂何耆仲開濟
堂小記云堂閱歲久垂壓矣涪熙疆圉作噩瀆山何
耆仲假守舉而新之因訪善本重肖侯像取老杜兩
朝開濟老臣心之句以字堂巫山尉任份來董事春
二月乙亥落成丁謂臥龍山詩日長春老職司閒縱
轡因尋負郭山花氣半飄青靄外泉聲多在白雲間
香燈肅肅嚴僧事鐘梵蕭蕭爽客顏坐有詩人樽有

蜀中名勝記 卷二十一
酒擬拋城市宿禪關溫陵曾慥和承平桑者自閑閑
巴俗燒畬滿四山招集賓僚來野次追呼父老到田
間及時勸課知宣化繼踵催科卻厚顏底事羣僧享
安逸坐令檀越叩禪關陸游題臥龍山詩涪翁幾日
客遺墨徧蒼崖作吏今三月偷閒始一來雲歸就簷
宿江怒觸山迴更欲窮幽賞城頭疊鼓催查籥題臥
龍武侯廟詩山巔祠貌儼丹青千載懷人爲一登隱
隱故營連白帝茫茫恨水向西陵石根蘭芷香無價
雲頂松杉翠作層人事天機古難料詩成試語定中
僧周時題臥龍詩雨過羣峰入骨青杖藜曾憶去年

登無風細路尋蕭寺落照孤城認固陵割據江濤隨
渺渺清明花樹又層層不聞不見無窮盡唯有禪房
白足僧王十朋題臥龍山觀音泉二十韻呈行可元
章云去歲游廬山社中觀白蓮不飲遠公酒聊酌聰
明泉肩輿過武昌乘興西山巔巖乳飲菩薩詩篇誦
蘇仙夔州苦無井瘿俗殊可憐竹筍喉不乾可流不
可煎日汲臥龍水屢頰擔夫肩所取卻幾斛深慙未
投錢前日招提游入耳聲涓涓泓澄可照膽草木皆
光妍道人出新茗林間手親研至今清夜夢猶到幽
亭邊交游况離索回首成悽然何時鹿啣啣重訪山

中禪柯甲題臥龍武侯廟詩巴江一綫東巴山不礙
登臨氣象寬寺隱蟠龍松影亂碑殘科斗草痕漫十
分澗灑隨宜暖一酌泓澄徹骨寒欲說孔明千古恨
令人勇踏玉驄鞍三山朱煥詩云野性從來物外便
瘦筇拄到臥龍巔下臨斗絕疑無地峻極盤旋別有
天遠遠峰巒猶帶雪蒼蒼竹柏幾經年武侯向日三
分國大士今朝一派泉休泥遺編論往事且將此水
滌眞田淵源瑩潔惟方寸世界收藏幾大千山谷臥
龍行記云天水張茂先世克南昌黃庭堅魯直弟叔
向嗣直建中靖國元年三月丁卯同來時左綿道人

思順開法席於此山道俗歸心荆棘草萊化爲金碧
新雨晚晴同登中閣觀白鹽之崇岫想少陵之風流
歎大雅之不作裴徊久之跋云涪翁以文學名世書
學徐浩而婉美翁死三十年矣今人見其翰墨及從
之遊者莫不欣然景慕之都運徽猷久從翁遊而文
學翰墨皆造其妙步趨之相若模範之相承譽望之
相繼輝映炳耀卓乎其能肖也後之人苟未知涪翁
之賢請觀於公可知矣苟有未知公之賢請觀於涪
翁可知矣建炎五年正月日門生從政郎夔州奉節
縣令主管勸農公事王行謹跋 穎川劉均國邀古

雍李紹隆洛陽邢仲時陽翟衛師房黃山韓次阮游
臥龍山咸平院謁長老忍禪師建炎四年十月晦日
均國之子壤侍 侍郎閣公運使張公同遊臥龍紀
行云余初自宣威幕府送季長奏事北闕入道山爲
學士後三年余始被命造朝遂玷論思之列今丐祠
得請而歸會季長護漕夔門相與道舊故握手驚嘆
蓋闊別已十年矣辱通家燕欵浹辰亡倦最後游臥
龍山松風蕭爽雲日蔽虧千載英靈若恍來下晚趨
躍馬城赤甲白鹽峻極天半晴光返照噴浪帖伏慈
明行酒道韜誦詩至大醉而去不圖天涯爲樂之至

於斯也淳熙九年三月癸巳唐安閣蒼舒才元書
王十朋臥龍行記云永嘉王龜齡少城周行可海陵
查元章載酒來遊時凍雨初霽風日清美山谷明秀
照人道傍襍花盛開籃輿徐行應接不暇寺有茶蘼
羅絡松上如積雪崇蘭數百本秀發巖石間微風透
香所至芬郁東榮牡丹大叢雨前已開道人植葢護
持留以供客飲罷縱步泉上淪茗賦詩而歸乾道丙
戌清明前四日 陸游跋關著作臥龍行記云著作
關公出使峽中風采峻甚仕者人人震慄莫敢仰視
游以孤生起罪籍萬里佐州淺闇滯拙自期且汰去

而關公獨厚遇之舉酒賦詩談臺閣舊事忘其位之重也公免歸之明年游以事至臥龍山咸平寺長老惠璉言公往有行記今將刻之石因屬游書其末游曰方關公之門可炙手時此書伏不出今公歸臥青城山中賓客解散形勢一變而璉方刻其書爲不朽計嗟乎足以愧士大夫矣乾道七年七日左奉議郎通判夔州軍州主管學事陸游謹識按關著作者青孫城人黃人傑臥龍紀行云帥帳跨鼉陳損之繡衣具茨王璆聯轡登臥龍置酒高會賓客從者十有六人是日金虎嘯風丹雲蔽日涼生尊俎興在江山獻酬

賡唱之餘挹大士泉訪海仙像塵慮息神情清瞿塘晝漏垂盡乃去眞勝游也慶元己未七月十有四日魯齋黃人傑書李壘臥龍行記云眉山李季允同永嘉王申父襄陽晏亞夫來遊時春陽驟驕風埃四起酌泉松石間意頗愜無何雷雨忽至晚登寺閣望赤甲白鹽山色如洗相與舉酒樂甚遂留宿山房慶元六年五日水經註云白帝城西有孤石冬出水二十餘丈夏卽沒秋時方出灩澦如象行人莫上灩澦如馬行人莫下峽人以爲水候李膺益州記云灩澦堆與水漲沒數十丈其狀如馬舟人不敢進故曰

灑瀕又曰淫豫言舟子取途不決水脈故猶預也南史云淫豫大如襍瞿塘不可觸樂府云淫豫大如馬瞿塘不可下類要云淫豫大如鼈瞿塘行舟絕淫豫大如龜瞿塘不可窺坤元錄又作猶豫水經註灑瀕歌曰江頭白渚堅相持倏忽淪沒別無期孝子傳云庾子輿扶父柩過瞿塘六月水泛子輿禱而遂平既過泛溢如故人歌之曰灑瀕如牛本不通瞿塘水退爲庾公成子韶高齋題灑瀕水則云開封成鏞子韶寄瞿塘關懷安蹇渥澤民成都郭公臨舜卿東去過高齋覽形勝遣人撐舟垂繩墜石則灑瀕之水約

八十四丈子韶曰夏中江漲灑瀕上水猶三十餘丈可想見矣澤民之子慶胄侍淳熙乙巳正月二十五日范成大吳船錄云六月丙辰泊夔州早遣視瞿塘水僅能漫灑瀕之頂盤渦散出其上謂之灑瀕撒髮人云如馬尙不可下况撒髮邪是夜半水忽驟漲渰及排亭及明走視灑瀕則已在五丈以下或可以僥倖入峽而夔人猶難之丁巳水漲未已遂決解維十五里至瞿塘口水平如席獨灑瀕之頂猶渦紋灑瀕舟拂其上以過搖櫓者皆汗手死心面無人色蓋天下至險之地行路極危之時旁觀者盡皆驚阻余

已在舟中一切付之自然不暇問據胡床座招頭處任其盪兀每一舟入峽數里後舟方續發水勢怒急恐猝相遇不可解折也帥司遣卒執一旗次第立山之上一舟平安則簸旗以招後船舊語云灩澦大如襍瞿塘不可觸灩澦大如馬瞿塘不可下此俗傳灩澦大如象瞿塘不可上蓋非是也後人立石辨之甚詳峽中兩岸高巖峻壁斧鑿之痕皴皴然而黑石灘最號險惡兩山東江驟起水勢不能平余來此水勢適可俗所謂茶槽者又水大漲滄沒草木謂之青草齊則諸灘之上水寬少浪可以犯之余之來此水

未能盡漫草木但名草根漲亦不可涉然犯難而行不可回首也陸游入蜀記云二十六日晚至瞿塘關唐故夔州與白帝城相連杜詩白帝夔州各異城蓋言難辨也關西門正對灩澦堆堆碎石積成出水數十丈土人云歲旱時石露大半有三足如鼎狀關者孫瞿塘關行記云乾道庚寅中元日關者孫約李時雨陳彥岳建壽宋嵩李普張徽之雍大椿飲餘三峽堂晚攜餘航下瞿唐關訪夔刺史舊治客曰今之司關者之居是也遂飲於此茂林修竹間小亭縈紆客曰此唐劉夢得故宅址夢得遺墨舊有石好事者

取去復飲關上高齋誦少陵薄雲巖際宿孤月浪中翻之詩歎此老具眼如此夔江山元麤惡惟少陵所紀處獨異高齋其一也高齋故基屋隘而陋子惜之方欲爲大守王君言客陳彥辛景賢出席願出力更築之僕謂不可隘而陋亦不可侈而大此少陵誅茅避世意也併書以告二子云景賢今司瞿唐關者詩話珊瑚鈎云唐周邕自蜀買奴曰水精善沉水乃崑崙泗水之屬也邕疑瞿塘之險必有怪使水精入瞰之久乃出曰下有關不可渡得珠貝而還按今謂之下關城

樂府解題曰瞿盛也唐陂池也言盛

水其中可以行舟也又云夏則爲瞿冬則爲唐杜甫瞿唐兩厓詩云三峽傳何處雙厓壯此門入天猶石色穿水忽雲根猿獮鬚髯古蛟龍窟宅尊羲和冬馭近愁畏日車翻白居易夜入瞿塘峽詩云瞿塘天下險夜上信難哉岸似雙屏合天如匹練開逆風驚浪起拔柁暗船來欲識愁多少高於灩澦堆宋肇峽口詩云萬里西南路瞿塘居上游峽分山對立江合水爭流蛟鰐從來患風波自古愁幾時飛雨漿歸去滿帆秋蘇軾瞿塘峽詩云自昔懷清賞今茲得縱探長江連楚蜀萬派瀉東南合水來如電黔波綠似藍餘

蜀中名勝記 卷二十一
流細不數遠勢競相參入峽初無路連山忽似龕縈
紆收浩渺蹙縮作淵潭風過如呼吸雲生似吐含墜
崖鳴窅窅垂蔓綠穆穆冷翠多崖竹孤生有石楠飛
泉飄亂雪怪石走驚驂絕澗知深淺樵僮忽兩三人
煙偶逢郭沙岸可乘籃野戍荒州縣邦君古子男放
衙鳴晚鼓留客薦霜柑聞道黃精草叢生綠玉簪儘
應充食飲不見有彭聃氣候冬猶暖星河夜半涵遺
民悲昶衍舊俗接魚蠶版屋漫無瓦巖居窄似菴伐
薪常冒險得米不盈甌歎息生何陋劬勞不自慙葉
舟輕遠泝大浪固常諳矍鑠空相視嘔啞莫與談蠻

荒安可駐幽邃信難航獨愛孤棲鶻高超百尺嵐橫
飛應自得遠颺似無貪振翮遊霄漢無心顧雀鷁塵
勞世方病局束我何堪盡解林泉好多爲富貴酣試
看飛鳥樂高遁此心甘蘇轍入峽詩云舟行瞿塘口
兩耳風鳴號渺然長江水千里投一瓢峽門石爲戶
鬱怒水力驕扁舟落中流浩如一葉飄呼吸信奔浪
不復由長篙兩山蹙相值望之不容舫漸近乃可入
白鹽最雄高草木皆倒生哀叫悲元猿白雲繚長袖
零露如飛毛 峽程記曰瀘合遂屬四中皆峽之郡
自蠻江桔栢淹導等江至此二百八十江會於峽前

次荆門郡四百五十灘卽有清水重峰胡灘漢灘忽雷閃電沱灘瀨灘狼尾使君主簿二灘以沉舟得名其他不悉記三峽者卽明月仙山廣澤其他瞿塘灩澦燕子屏風之類皆不預三峽之數唐楊炯唐溪峽詩廣溪三峽首曠望兼川陸山路遶羊腸江城鎮魚復喬枝百丈偃飛水千尋瀑驚浪迴高天盤渦轉深谷漢氏昔云秀中原爭逐鹿天下有英雄襄陽有龍伏常山訓軍旅永安興板築池臺忽已傾邦家遽淪覆庸才若劉禪中佐爲心腹設險猶可存當無賈生哭經云江水又東逕廣溪峽註云斯乃三峽首也

其間三十里頽巖倚木厥勢殆交北岸山上有神淵淵北白鹽厓高千餘丈天旱然火白鹽推燼入淵卽雨常璩以澤有神鳴鼓則雨蜀都賦謂應鳴鼓而興雨也刺史二千石經過皆不得鳴角伐鼓商旅上下恐觸石有聲乃以布裏篙足此峽多猿猴不生北岸北唯一處或有取之放著北山中初不聞聲將同狝獸渡汶而不生矣其峽蓋自神禹鑿以通江郭景純所謂巴東之峽夏后疏鑿者杜甫白鹽山詩云徐步移斑杖看山仰白頭翠深開斷壁紅遠結飛樓日出清江望暄和散旅愁春城見松雪始擬放歸舟按盛

宏之荊州記謂漢高祖伐秦途經於此見淵中白壁赤柱狀若官府因名龍淵云 經云江水又東南逕赤岬城註云是公孫述所造因山據勢周迴七里一百四十步東高二百丈西北高一千丈南連基白帝山甚高大不生樹木其石悉赤土人云如人袒胛故謂之赤岬山淮南子曰傍皇於山岬之旁注曰岬山脅也郭仲產曰斯名將因此而興矣註云赤甲山巖穴中露一匣甚高不可升相傳乃古兵書匣 經云江水又東逕魚復縣故城南註云故魚國也春秋左傳文公十六年庸與羣蠻叛楚莊王伐之七遇皆北

唯裨儵魚人逐之是也地理志謂江關都尉治公孫述名之爲白帝城取其王巴蜀蓋巴東郡治也漢獻帝初平元年分巴爲三郡以魚復爲固陵郡蹇胤訴劉璋改爲巴東郡治白帝山城周迴二百八十步北緣馬嶺接赤甲山其間平處南北相去八十五丈東西七十丈又東傍灤溪卽以爲隍西南臨大江闕之眩目唯馬嶺小差委迤猶斬爲路羊腸數四然後得上益州刺史鮑陋鎮此爲譙道福所圍城裏無泉乃南開水門鑿石爲函道上施木天公直下至江中有似猿臂相牽引汲然後得水水門之西江中有孤石

爲淫預石冬出水二十餘丈夏則沒亦有出處矣縣有夔溪卽狼山清江也經所謂夔水出焉益州記曰水色清照十丈分沙蜀人見其澄清因名清江也水經注云昔廩君浮土舟於夔水據捍關而王巴是以法孝直有言魚復捍關臨江據水實益州禍福之門漢書地理志云江關治魚復寰宇記云蜀漢章武二年先主爲吳所敗改白帝爲永安晉太康中復永安爲魚復有故江關在江南岸北對州城宋太始三年以山峽嶮隘多寇賊立三巴校尉以鎮之宋末廢唐置都督府及刺史郡治於此文苑英華裳袞授

持節都督夔州諸軍事兼夔州刺史栢貞節制云山峽雄重江關要衝輿地碑曰夔州都督府記唐會昌五年刺史李貽孫文繆師禹書見歐陽公集古錄今在漕臺集古錄云余嘗謂唐世人人工書故其名湮沒者不可勝數每與君謨嘆息於斯也如具靈該繆師愈今人尙不知其姓名况其書乎余以集錄之博僅各得其一爾 碑目云唐夔州刺史廳壁記長慶二年五月一日刺史中山劉禹錫撰今見存 張說下江向夔州詩天明江霧歇洲浦棹歌來綠水逶迤去青山相向開城臨蜀帝祀雲接楚王臺舊知巫山

蜀中名勝記 卷二十一
上遊子共徘徊司空曙送夔州班使君詩魚國巴庸
落麾幢漢守過曉檣爭市隘夜鼓祭神多雲白當山
雨風清滿峽波夔陵舊人吏猶誦兩歧歌戴叔倫送
盧使君赴夔州詩鏡管隨旌旆高秋遠上巴白波連
霧雨青壁斷蒹葭凭几雙童靜登樓萬井斜政成知
變俗當應畫輪車唐求舟行夜泊夔州詩維舟鏡面
中迥對白鹽峰夜靜沙堤月天寒水寺鐘故園何日
到舊友幾時逢欲作還家夢青山一萬重鄭谷入夔
州詩萬家烟靄裏隱隱見夔州夜靜明月峽春寒堆
雪樓獨吟誰會解多病自淹留往事如今日聊同子

美愁張佑送曾黯游夔州詩不遠夔州路層波灩澦
連下來千里峽入去一條天樹色秋帆上灘聲夜枕
前何堪正危側百丈半山巔又送楊秀才入蜀夔詩
鄂渚逢游客瞿塘上去船峽深明月夜江靜碧雲天
舊俗巴渝舞新聲蜀國絃不堪揮慘恨一涕淚潸然
釋齊已送周秀才遊峽中詩又向夔城去知難動旅
魂自非亡國客何慮斷腸猿灩澦分高仞瞿塘露淺
痕明年期此約平穩到荆門 白帝城公孫述所築
也東觀漢記白帝城舊名魚復公孫述見白龍入井
中以為應己之祥改爲白帝陳子昂白帝懷古詩云

日落滄江晚停橈問土風城臨巴子國臺沒漢王宮
荒服猶周甸深山尙禹功巖懸青壁斷地險碧流通
古木生雲際歸帆出霧中川途去無限客思坐何窮
杜甫上白帝城詩城峻隨天壁樓高望女墻江流思
夏后風至憶襄王老去聞悲角人扶報夕陽公孫初
恃險躍馬意何長又上白帝城樓詩江度寒山閣城
高絕塞樓翠屏宜晚對白谷會深遊急急能鳴鴈輕
輕不下鷗夔陵春色起漸擬放扁舟 城中有白帝
廟入蜀記云白帝廟氣象甚古松柏皆百年物有數
碑皆孟蜀時立庭中石筍有黃魯直建中靖國元年

題字又有越公堂隋楊素所創少陵爲賦詩者已毀
今堂近歲所築亦甚宏壯自關而東卽東屯少陵故
居也碑目云關城白帝廟碑凡三其一元和元年其
二長興二年其三廣政元年廟有斫殘栢柱大可十
圍高二十丈餘乃公孫述時樓柱所斫之處忽生枝
而不朽又有三石筍王十朋詩云白帝祠前石筍三
根連灑瀨立相參不知此石能言否往事應同老栢
談自註云有二栢甚古也石筍上行記云江通濟道
呂珣東玉黃庭堅魯直同來建中靖國元年三月
方輿勝覽云越公堂在瞿塘關城內隋楊素所建也

杜甫宴越公堂詩此堂存古制城上俯江郊落構垂
雲雨荒堦蔓草茅柱穿蜂溜蜜棧缺燕添巢坐接春
盃氣心傷艷藥梢英靈如過隙宴衎願投醪莫向東
流水生涯未卽拋張俞越公堂詩越公作隋藩烈烈
耀威武駐馬白帝城營堂壓巴楚俯瞰萬里流徘徊
覽千古鬼工役精魄梓制銜刃斧四阿無欒榭大厦
唯柱礎崢嶸露節角摩豁轉檐廡丹漆久磨滅風雲
尙吞吐自註云堂奇構宏敞內無撐柱覓視中脊邈
不可度也 城隅有堂曰三峽堂呂商隱三峽堂行
記云商隱被命赴闕大卿李先生實帥夔門作三峽

堂成而未考也因相率置酒作樂其上同來者郡僚
張說之陳子長員仲文謝邦彥堂據峽口俯瞰洪流
震搖灑瀨眞爲偉觀歲淳熙己亥八月二十三日成
都呂商隱周父書宋肇詩云林巒十里上巉巖飛檻
初憑縹緲間夔子風煙依白帝夜郎耕稼接烏蠻砌
橫亂石遙臨澗門對高峰近帶山咫尺驚湍吁莫測
每來憑眺念江關又云初尋磴道踏雲煙漸引茆檐
屋數椽江影動搖波面日山光隱見峽中天放懷樽
酒凭欄客回首舷歌趁市船要與州人同此樂移花
種竹滿巖前 有杜甫宅少陵移居夔州郭詩云伏

枕雲安縣遷居白帝城春知催柳別江與放船清農
事聞人說山光見鳥情禹功饒斷石且就土微平又
入宅詩云奔峭背赤甲斷厓當白鹽客居愧遷次春
酒漸多添花亞欲移竹鳥窺新卷簾衰年不敢恨勝
槩欲相兼其二亂後居難定春歸客未還水生魚復
浦雲暖麝香山半頂梳頭白過眉拄杖斑相看多使
者一一問函關其三宋玉歸州宅雲通白帝城吾人
淹老病旅食豈才名峽東風常急江流氣不平祇應
與兒子飄轉任浮生其西閣詩云西閣百尋餘中宵
步綺疏飛星過水白落月動沙虛擇木知幽鳥潛波

想巨魚親朋滿天地兵甲少來書又西閣雨望詩樓
雨霑雲幔山寒着水城徑添沙面出湍減石稜生菊
蕊淒疏放松林駐遠情滂沱朱檻濕萬慮傍簷楹又
夜宿西閣曉呈袁二十一曹長詩城暗更籌急樓高
雨雪微稍通綃幙霽遠帶玉繩稀門鵲晨光起檣烏
宿處飛寒江流甚細有意待人歸輿地紀勝云城
東有東瀼水公孫述於水濱墾稻田因號東屯東屯
之田可得百許頃稻米爲蜀第一郡給諸官俸廩以
高下爲差帥漕月得九斗故王龜齡詩云少陵別業
古東屯一飯遺忠畝存我輩月叨官九斗須知粒

粒是君恩陸務觀高齋記云少陵居夔三徙居皆名高齋其詩次水門者白帝城之高齋也依藥餌者瀼西之高齋也見一川者東屯之高齋也又云東屯李氏居已數世上距少陵纔三易主唐大厯初故劬猶在杜甫從瀼西移居東屯詩云白鹽危嶠北赤甲古城東平地一川隱高山四面同烟霜淒野日秔稻熟天風人事傷飄轉吾將守桂叢又東屯復瀼西一種住青溪來往皆茅屋淹留爲稻畦市喧宜近利林僻此無蹊若訪衰翁語須令賸客迷又道北逢都使高齋見一川子能渠細石吾亦沼清泉枕帶還相似柴

荆卽有焉斫畚應費日解纜不知年又牢落西江外參差北戶間久遊巴子國臥病楚人山幽獨移佳境清深隔遠關寒空見鷓鷯回首憶朝班關耆孫遊東屯詩呼舩渡西瀼策馬行東屯猶有竹下屋依然柴作門林深多鳥雀山對有猿猿世隔劬猶在堂非基自存稼雲迷曠野屏翠墜層軒土厚疑吾里溪清何處源殮英金有種飯粒玉爲根蘆笋戀春渚蕨芽蕃故園山名竊諸葛城榜爲公孫雲雨峽前夢琵琶山後村留人惟野趣隔市絕塵喧白巽東屯行云雨足稻畦新水滿插秧未半青短短馬塵追逐下關頭北

望東屯轉山坂一川洗盡峽中想遠浦疏林分氣象
溝塍漫漫堰源低灘瀨泠泠石磯響中田築場亦有
廬翬飛夏屋何渠渠李氏之子今地主少陵祠堂疑
故居劉昉東屯祥雲寺行記云昭興戊申正月中澣
出郊勸耕至東屯因落少陵故居祠堂之成聞祥雲
寺後有瑞石歸路就往觀之策杖行山澗亂石間踰
里許石果異也事無大小必先難而後獲是日自東
屯還過瞿塘已將暮任賓僚之去留其同至者趙沂
詠道文定國公才鄧高叔誼王鼎子新李驥元駿家
茂秀實張聿述之朱齊卿醇甫李宗臣元塵楊譽時

美真勝賞也劉昉方明書 辛昆曰夔州百牢關兵
馬不可越杜甫詩中巴之東巴東山江水開闢流其
間白帝高爲三峽鎮瞿唐險過百牢關寰宇記云三
鉤鎮在州東三里鐵鎖斷江山橫江亘張兩岸造舟
爲梁施戰床於上以禦寇焉鎮居數溪之會故曰三
鉤唐武德二年廢碑目云鑠水記碑字但紀官名有
都押衙金吾大將軍白元暉等字後漢書岑彭攻江
關偏將軍魯奇應募直衝浮橋攢柱有反把鉤奇船
不得去皆殊死戰因飛炬焚之始得入關五代史後
唐張武石照人仕王建爲破浪都頭大破高季興於

夔以功陞鎮武軍節度使武常作鐵絙絕江中流立
柵於兩端謂之鎖峽宋史太祖遣曹彬伐蜀示以地
圖指鎖江曰我軍泝流至此慎勿以舟軍爭勝中興
小歷云景定五年守將徐宗武於白帝城下巖穴設
攔江鎮七條長二百七十七丈五尺五千一十股又
有二鐵柱各六尺四寸刻徐宗武字 志云白帝城
東十五里有勝己山以高出眾山之上也王十朋命
名龜齡四月二十一日同運使周文查丈行香報恩
精舍登佛牙樓觀勝己山望江流之險飯蔬啜茗而
還因作詩云籃輿拂曉出東關鐘磬聲聞杳靄間心

欲報恩頻入院人逢勝己更觀山竹香細細禪房靜
江水渾渾野渡閑欲問魚人興廢事黃鸝隔葉語綿
蠻劉儀鳳報恩寺詩序云寺有唐立夫題字云本晉
鐵佛寺有像今徙他處而碑記無存者是日寺僧汲
相國泉烹香山茶甚新因次韻奉呈安撫待制詩云
晚途無力透空關佛土維留草數間決去已曾盟白
水重遊仍欲住青山皇華詩句羞懷祿儒帥封章屢
乞閑似我更宜歸計早雨簑煙艇學漁蠻碑日以夔
州始興寺移鐵像記爲劉禹錫撰 唐文若報恩寺
行記云紹興丙子七月峽中久不雨秋暑熾盛己巳

晦連夕霧霈水復大漲余繫舟瀆中杖策同二子輅
軫來遊道人定觀迎謁欣然乃漢中舊識憇食方丈
登佛牙閣愛其江山鮮明草木秀潤頓失三峽之陋
寺本晉鐵佛院距今八百禩屢易而不廢良有以也
寺產香山茶因名香山寺黃魯直香山寺行記云
太守高仲本率南昌黃魯直墊江譚處道同來山水
喬木僧房高下景物清絕爲夔路第一建中靖國元
年二月庚申微雨中來庭堅書 奉節巫山之間有
天池浸可千頃杜甫天池詩云天池馬不到嵐壁鳥
纔通百頃青雲杪層波白石中鬱紆騰秀氣蕭瑟浸

寒空直對巫山峽兼疑夏禹功魚龍開闢有菱芡古
今同聞道奔雷黑初看浴日紅飄零神女雨斷續楚
王風欲問支機石如臨獻寶宮九秋驚鴈序萬里狎
漁翁更是無人處誅茅任薄躬

蜀中名勝記卷之二十一

西川魚鰾關關

魚鰾關關
無人敢和茶
王
支
宮
日
文

蜀中名勝記卷之二十一